

## 中国西南民族史 配布資料

### 11 大理国の中絶と高氏専権

#### 11.1 『増訂南詔野史』上卷

正明 思廉之孫 偽諡保定皇帝

正明，宋神宗辛酉元豐四年即位。明年，改元保定。又改元建安，天佑。宋哲宗甲戌紹聖元年，明在位十三年，爲君不振，人心歸高氏，群臣請立鄯闡侯高昇泰爲君，正明遂禪位於僧，而段氏中絶矣。

……

大中國

高昇泰 偽諡富有聖德表正皇帝

高昇泰，宋哲宗甲戌紹聖元年，受大理國段正明之禪即位。改國號曰大中國。明年，改元上治。昇泰，岳侯高方之裔，大理點蒼山蓮花峯下芒湧溪人。將生，其父襲岳侯，智昇往石雲寺在點蒼山白雪峯麓。進香回，遇一老叟云：爾家將生貴子，可速歸。智昇至家，而昇泰適生，心頗異之。及長，有材器，仕爲清平官，兼九爽之事，譽望日重。思廉出遊，猝遇烈風，吹踏其馬。廉將墜，智深躍前扶之。廉德智昇，賜以宮人及珠玉。楊允賢（判）〔叛〕，廉命智昇討之，以功加太保，封德侯，旋晉鄯闡侯，世襲。及楊義貞篡逆，智昇令昇泰起東方兵，誅義貞而立廉義之姪壽輝。輝以智昇爲布燮，昇泰襲鄯闡侯。輝在位災異迭興，因禪位於思廉之孫正明。明爲君不振，人心歸高氏。遂請昇泰爲君，而正明禪以位焉。哲宗丙子紹聖三年，昇泰在位二年，寢疾。遺命曰：我之立國，以段氏之弱，我死，必以國仍還段氏，慎勿背我。及卒，其子高泰明遵遺命，還位正明之弟正淳。段氏復興，號後理國。高氏相之，政令皆出其門，國人稱爲高國主，段氏擁虛位而已。

#### 11.2 『増訂南詔野史』上卷

段正淳 大理國正明之弟 偽諡中宗文安皇帝

段正淳，宋哲宗丙子紹聖三年復得國，即位，號後理國。以高泰明爲相國，執政柄，高泰運爲柵主。明年，改元天授。又改元開明，天政，文安，赦徭役。築楚雄城，在今楚雄府城西北二里。以封高泰明之姪高明亮。徽宗癸未崇甯二年，遣高泰運奉表入宋，求經籍，得六十九家，藥書六十二部。鄯闡李觀音得來朝，進金馬杖八十節，人民三萬三千戶。淳賜得八章禮衣，龍頭劍，擢爲安東將軍。蔚按：蒙氏時有安東將軍，（季）〔李〕珠所築安東城，在今大理府趙州城東二里。緬人、波斯、崑崙三國進白象及香物。十月，彗星見西方，大疫。徽宗戊子大觀二年，正淳禪位爲僧，在位十二年，子和譽立。

和譽又名正嚴 封雲南節度使大理國王，偽諡憲宗宣仁皇帝

和譽，宋徽宗戊子大觀二年即位。明年，改元日新。又改元文治、永嘉、保天、廣運。七月中元節，各方貢金銀、羅綺、珍寶、犀象萬計，牛馬遍點蒼。徽宗辛卯政和元年，地大震，損十六寺。三十七部（判）〔叛〕，高相國泰明討平之。使四子高明清居鄯闡鎮守。政和五年，緬人進金花、犀象。政和六年。遣儒官鐘震、黃漸賚勅褒高泰明相國忠貞，封平國公。是年，遣使入貢於宋。高泰明卒，封國師。泰明生八子，高智昌以罪流死。其下伊、何二人謀爲執仇，乘譽入寺進香，圖弑逆，事露被收。譽嘉二人之義，赦之，爲立義士塚。高泰運立，主國事。六月，三日並出。政和丁酉七年，命子紫琮充進奉使，入貢於宋。詔遣使冊封譽爲金紫光祿大夫、檢校司空、雲南節度使、上柱國、大理國王。徽宗己亥宣和元年正月，彗出，慕甯、遠、矣、破、馬等叛。三月，出師征之，兵敗。三十七部蠻復叛。陷鄯闡，高明清死之。郡臣以高昇泰姪商量成有德，請立爲相，號中國公。徽宗丙午靖康元年五月，金星入月，大火，焚三千九百家。南宋高宗丙辰紹興六年，王遣使貢象馬於宋，廣西經畧安撫使奏之，詔護送行在，優禮答之。紹興十六年三月十四日，大霧，歷二十四日方開。高宗丁卯紹興十七年，王老，因諸子內爭外叛、遂禪位爲僧，在位三十九年。子正興立。

### 11.3 『宋会要輯稿』第一百九十七冊 蕃夷四之五八至六〇 大理國

徽宗政和六年四月，詔：「大理國入貢儀制，令尙書省別行措置。其經由路分，各差監司一員，專一管勾排辦；應干支費，並從官給，不得搔擾。」十二月二十三日，大理國遣使貢方物。七年五月五日，詔：「大理國王段和譽可雲南節度使、金紫光祿大夫、檢校司空、上柱國、大理王，加食邑一千戶，實封五百戶。」……十三日，大理國進奉使天駟爽彥賁李子琮，副使坦綽李伯祥見於紫宸殿。四月十二日辭於紫宸殿。二十五日，廣州觀察使管勾押伴大理國進奉人使黃璘奏：「先奉聖旨，令於賓州置局接納大理入貢，差官吏引伴；續準御筆，與承議郎、直秘閣、廣南東路轉運副使徐惕、同押伴赴闕。其大理使到闕，押伴官係入內侍武節大夫、尙食、典御何伯通。臣契勘大理國朝貢，其應干合行事件，並已創集，別無遺闕。」詔：「何伯通、徐惕各轉一官。」二十八日，湖北路提舉學事徐行奏：「據鼎州申：押伴大理國進奉使到州，聞學校文物繁盛，乞詣州學瞻拜宣聖。知州張察同使人、押伴官到學，使人抵揖諸生及謁殿如儀，陞堂謁見諸生；又問御書閣，乞觀皇帝御製，舉首讀遍，以笏叩頭；要巡齋觀看，每至一齋，皆頂禮。伏望宣付史館。」詔：「送秘書省。」六月二十八日，都省言：「檢會五月八日，大理國入貢回元，陳請接納，及管押官廣州觀察使黃璘，已轉一官回授。」詔：「黃璘長男暉，係奉儀郎，前充廣南西路書寫機宜文字，勾當大理入貢，可轉兩官；第二男昨，係閣門宣贊舍人，轉一官；第三男夢，係從義郎、閤門抵候，除閣門宣贊舍人。」

光堯皇帝紹興三年十月十三日，廣西縣撫諭明橐奏：「大理國欲進奉及賣馬事。」上諭宰執曰：「金買馬可也，進奉可勿許，安可利其虛名而勞民乎？」朱勝非奏曰：「異時廣西奏：大理國人貢事可爲監，當時言者深指其妄，黃璘以是獲罪。」上曰：「遐方異域，何由得實？彼云進奉，實利于賈販，但令帥臣邊將償其馬直，當價，則馬當繼至，庶可增諸將騎兵，不爲無益也。」

六年七月二十七日，廣南西路經略安撫使司奏：「威遠寨界首郊用譚昂等，接大理等人使進奉表章、國信及象、馬，已備酒食糧米迎待管設，約五月五日到橫山寨。」詔：「大理國所進方物，除更不收受外，餘令本路經略司差人押赴行在。其回賜，令轉運提刑司於應管錢內取撥，依體例計價，優與回賜。章表等入遞投進，候到，令學士院降敕書回答。」九月二十八日，翰林學士朱震言：「乞密諭廣西帥臣，凡是買馬去處，並擇謹密可信之士，勿遣輕儇生事之人；務使羈縻勿絕，邊疆安靜。異時西北路通，則漸減廣西買馬之數，庶幾消患於未然。」詔：「廣西帥臣提點買馬官常切機察，不得因此致生邊患。」以上『中興會要』，『乾道會要』無此門。

### 11.4 『建炎以來朝野雜記』甲集十八 廣馬

廣馬者，建炎末，廣西提舉峒丁李域始請市戰馬赴行在。四年五月丙辰。紹興初，隸經略司。三年春，卽邕州置司提舉，正月壬午。市於羅殿、自杞、大理諸蠻，未幾廢買馬司，以帥臣領其事。七年，胡待制舜陟爲帥，歲中市馬二千四百匹，詔賞之。其後馬益精，歲費黃金五鎰，中金二百五十鎰，錦四百端，綺四千匹，廉州鹽二百萬斤，而得馬千五百匹。馬必四尺二寸以上，乃市之，其直爲銀四十兩。每高一寸增銀十兩，有至六、七十兩者。土人云：「其尤駟駿者，在其出處，或博黃金二十兩，日行四百里；但官價有定數，不能致此耳！」然自杞諸蕃，本自無馬，蓋又市之南詔。南詔，今大理國也，去自杞國可二十程。而自杞至邕州橫山寨二十二程，橫山寨至靜江府又二十余程。羅殿國又遠於自杞十程。乾道九年冬，有大理人李觀音得等二十二人，至橫山求市馬，知邕州姚恪盛陳金帛誇詡之，其人大喜，出一文書，稱利貞二年十二月，約來年以馬來，所須文選、五經、國語、三史、初學記及醫、釋等書，恪厚犒遣之，而不敢奏也。……

### 11.5 『宋会要輯稿』第一百八十三冊 兵二二之一至二九 買馬

（紹興三年）四月二十三日，詔：「邕州進士昌懋陳獻廣南西路買馬利便可採，特與中州文學，差充廣南西路買馬準備差使。」以懋言，伏見大理國管下善闡府，有僞呼知府姓高者，稍習文典，粗識禮儀。前提舉洞丁李域，差效用賣牒論買戰馬，即時繳申本國。國王令備戰馬一千匹副朝廷，先備馬樣五十匹，差人呈納。若是中用，請差人使接引上件馬一千匹……

十月十三日，廣西撫諭明橐言大理國欲進奉及壳馬事。上曰：「令壳馬可也，進奉可勿許，安可利其虛名而勞民乎。……

### 11.6 『宋会要輯稿』第一百八十三冊 兵二二之一至二九 買馬

（紹興六年）六月四日，廣西路經略司言，招馬效用譚昂去大理國招馬，經及八年，至去年九月內，（滿）〔蒲〕甘國王差摩訶菩俄托桑一行人，齎機密文字，與大理國王具章表匣，內差王與誠、楊賢明等管押象一頭、馬五百匹，隨昂前來，見在儂內佐部州駐扎，令昂先次齎牒申報。乞將上項所稱進奉象，儂自來體例，等量估定價值，優與分數，用火印訖，籍記毛、齒、格、尺，關申提舉買馬司，依所定價，支錢物酬答。揀選合格馬，別作一項，計綱起發，其起發過數，與准年額合買之數。」從之。

### 11.7 『宋会要輯稿』第一百九十九冊 蕃夷七之三至四六 歷代物貢

（紹興）六年七月二十七日，大理蒲甘國表貢方物。是日，詔：「大理、蒲甘國所進（元）〔方〕物，除更不收受外、余令廣西經略司差人押赴行在。其回賜，令本路轉運提刑司于應管錢內取撥，付本司依自來體例計價優與回賜內。內章表等，先次入遞投進，令學士院降勅書回答。」……

### 11.8 『嶺外代答』卷五

#### 經略司買馬

自元豐間，廣西帥司已置幹辦公事一員于邕州，專切提舉左、右江峒丁同措置買馬。紹興三年，置提舉買馬司于邕。六年，令帥臣兼領。今邕州守臣提點買馬經幹一員，置廨于邕者，不廢也，實掌買馬之財。其下則有右江二提舉，東提舉掌等量蠻馬，兼收買馬印；西提舉掌入蠻界招馬。有同巡檢一員，亦駐劄橫山寨，候安撫上邊，則率甲兵先往境上，警護諸蕃人界。有知寨、主簿、都監三員，同主管買馬錢物。產馬之國曰大理、自杞、特磨、羅殿、毗那、羅孔、謝蕃、膝蕃等。每冬，以馬叩邊。買馬司先遣招馬官，齎錦繒賜之。馬將入境，西提舉出境招之。同巡檢率甲士往境上護之。既入境，自泗城州行六日至橫山寨，邕守與經幹，盛備以往，與之互市，蠻幕譙門而坐，不與蠻接也。東提舉乃與蠻首坐于庭上，羣蠻與吾兵校博易、等量于庭下。朝廷歲撥本路上供錢、經制錢、鹽鈔錢及廉州石康鹽、成都府錦，付經略司為市馬之費。經司以諸色錢買銀及回易他州金銀綵帛，盡往博易。以馬之高下，視銀之重輕，鹽錦綵繒，以銀定價。歲額一千五百匹，分為三十綱，赴行在所。紹興二十七年，令馬綱分往江上諸軍。後乞添綱，令元額之外，凡添買三十一綱，蓋買三千五百匹矣。此外，又擇其權奇以入內廄，不下十綱。馬政之要，大略見此。

……………

#### 邕州橫山寨博易場

蠻馬之來，他貨亦至。蠻之所齎，麝香、胡羊、長鳴雞、披氈、雲南刀及諸藥物。吾商賈所齎，錦繒、豹皮、文書及諸奇巧之物。於是譯者平價交市。招馬官乃私置場于家，盡攬蠻市而輕其征，其入官場者，什纔一二耳。隆興甲申，滕子昭為邕守，有智數，多遣邏卒於私路口邀截商人越州，輕其稅而留其貨，為之品定諸貨之價，列賈區於官場。至開場之日，羣商請貨于官，依官所定價，與蠻為市，不許減價先售，悉驅譯者導蠻恣買。遇夜則次日再市。其有不售，許執覆監官，減價博易。諸商之事既畢，官乃抽解，併收稅錢。賞信罰必，官吏不敢乞取，商亦無他糜費，且無冒禁之險。時邕州寬裕，而人皆便之。

### 11.9 『桂海虞衡志』（宋·范成大撰）

#### 志獸

蠻馬出西南諸蕃，多自毗那、自杞等國來。自杞取馬於大理，古南詔也，地連西戎，馬生尤蕃。大理馬為西南蕃之最。

雜誌

大理國間有文書至，南邊及商人持其國佛經題識，猶有用囿事者，囿武后所作囿字也。唐書称大禮國今其國止用理字。（以上錄自今本『桂海虞衡志』）

志蛮

大理，南詔國也。本唐小夷，蒙舍詔在諸部最強，故號南詔。自皮邏閣并五詔爲一，受冊封云南王，至異牟尋，封南詔王，至酋龍而称驃信，改元自稱大禮國，今其與中国接，乃稱大理國。與唐史禮、理字異，未詳所始。大理地廣人庶，器械精良，前志載之詳矣。邕州，右江水與大理大盤水通，大盤在大理之威楚府。而特磨道又與其善闡府者相接。自邕州道諸蠻僚至大理，不過四五十程。產良馬，可與橫山通，北梗自杞，南梗，特磨，久不得至。語在大理馬条下，乾道癸巳冬，忽有大理人李觀音得、董六斤黑、張般若師等率以三字爲名，凡二十三人至橫山議市馬，出一文書，字画略有法。大略所須『文選』、『五臣注』、『五經廣注』、『春秋後語』、『三史加注』、『都大本草廣注』、『五藏論』、『大般若』、『十六會序』及『初學記』、『張孟押韻』、『切韻玉篇』、『集聖歷』、『百家書』之類及須浮量鋼器并碗、疑即饒州浮梁瓷器。書梁作量。琉璃碗壺及紫檀、沉香木、甘草、石决明、井泉石、蜜陀僧、香蛤、海蛤等藥，稱利正二年十二月。其後云古文有云：「察實者不留声，觀行者不識詞，知己之人幸逢相謁，言音未同情慮相契。」吾聞夫子云：君子和而不同，小人同而不和。今兩國之人不期而會者，豈不習夫子之言哉。續短章伏乞斧伐，短章有：「言音未會意相和，遠隔江山萬里多」之語。其人皆有禮儀，擊誦佛書，碧字金銀字相間。邕人得其大悲經，称为坦綽趙般若宗祈攘目疾而書。坦綽、酋望、清平官皆其官名也。邕守犒來者甚厚以遣歸。然南詔地極西南，当爲西戎尤邇蜀都，非桂帥所当鎮撫。（以上今本『桂海虞衡志』無。今從『文獻通考』錄出。）

